

唐書合鈔

唐書卷第一百十四

列傳十四

封倫

子言道

兄子行高

蕭瑀

子銳

瑀兄璟

瑀兄子鈞

鈞子瓘

裴矩

子宣機

宇文士及

封倫字德彝觀州蓀人北齊太子太保隆之孫父子繡
隋通州刺史倫少時其舅盧思道每言曰此子智識過
人必能致位卿相開皇末江南作亂內史令楊素往征
之署爲行軍記室船至海曲素召之倫墜於水中人救
免溺乃易衣以見竟寢不言素後知問其故曰私事也
所以不白素甚嗟異之

以從妹妻之

素將營仁壽宮引爲土木

監隋文帝至宮所見制度奢侈大怒曰楊素爲不誠矣
殫百姓之力雕飾離宮爲吾結怨於天下素惶恐慮將
獲譴倫曰公當弗憂待皇后至必有恩詔明日果召素
入對獨孤后勞之曰公知吾夫妻年老無以娛心盛飾
此宮豈非孝順素退謂倫曰卿何以知之對曰至尊性
儉故初見而怒然雅聽后言后婦人也唯麗是好后心
旣悅帝慮必移所以知耳素嘆伏曰揣摩之才非吾所
及素負貴恃才多所凌侮唯擊賞倫每薦於文帝由是
擢授內史舍人大業中倫見虞世基幸於煬帝而不閑
吏務每有承受多失事機倫又託附之密爲指畫宣行

詔命諂順主心外有表疏如忤意者皆寢而不奏決斷
刑法多峻文深誣策勲行賞必抑削之故世基之寵日
隆而隋政日壞皆倫所爲也宇文化及之亂偪帝出宮
使倫數帝之罪帝謂曰卿是士人何至於此倫赧然而
退化及尋署內史令從至聊城倫見化及勢蹙乃潛結
化及弟士及請於濟北運糧以觀其變遇化及敗與士
及來降高祖以其前代舊臣遣使迎勞高祖知其皆附
逆黨方切讓使
就舍倫以祕
策干帝帝悅拜內史舍人尋遷內史侍郎高祖嘗幸溫
湯經秦始皇墓謂倫曰古者帝王竭生靈之力殫府庫
之財營起山陵此復何益倫曰上之化下猶風之靡草

自秦漢帝王盛爲厚葬故百官衆庶競相遵倣凡是古
冢邱封悉多藏珍寶咸見開發若死而無知厚葬深爲
虛費若魂而有識被發豈不痛哉高祖稱善謂倫曰從
今之後宜自上導下悉爲薄葬太宗之討王世充詔倫
參謀軍事高祖以兵久在外意欲旋師太宗遣倫入朝
親論事勢倫言於高祖曰世充得地雖多而羈縻相屬
其所用命者唯洛陽一城而已計盡力窮破在朝夕今
若還兵賊勢必振更相連接後必難圖未若乘其已衰
破之必矣高祖納之及太宗凱旋高祖謂侍臣曰朕初
發兵東討衆議多有不同唯秦王請行封倫贊成此計

昔張華協同晉武亦復何以加也封平原縣公兼天冊

府司馬

初竇建德援洛陽將趨虎牢倫與蕭瑀諫不可至是入賀王笑曰不用公言今日幸而捷豈智

者千慮或有失會突厥寇太原復遣使來請和親高祖

平倫謝素不及問羣臣和之與戰策將安出多言戰則怨深不如先和

倫曰突厥憑凌有輕中國之意必謂兵弱而不能戰如

臣計者莫若悉衆以擊之其勢必捷勝而後和恩威兼

著若今歲不戰明年必當復來臣以擊之爲便高祖從

之六年以本官檢校吏部尚書曉習吏職甚獲當時之

譽八年進封道國公尋徙封於密蕭瑀嘗薦倫於高祖

高祖任倫爲中書令太宗嗣位

實封六百戶

瑀遷尚書左僕

射倫爲右僕射倫素險詖與瑀商量可奏者至太宗前盡變易之由是與瑀有隙貞觀元年遘疾於尚書省太宗親自臨視卽命尙輦送還第尋薨年六十太宗深悼之廢朝三日冊贈司空諡曰明初倫數從太宗征討特蒙顧遇以建成元吉之故數進忠款太宗以爲至誠前後賞賜以萬計而倫潛持兩端陰附建成時高祖將行廢立猶豫未決謀之於倫倫固諫而止然所爲祕隱時人莫知事具建成傳卒後數年太宗方知其事十七年治書侍御史唐臨追劾倫曰臣聞事君之義盡命不渝爲臣之節歲寒無貳苟虧其道罪不容誅倫位望鼎司

恩隆胙土無心報效乃肆姦謀熒惑儲藩獎成元惡寘於常典理合誅夷但苞藏之狀死而後發猥加褒贈未正嚴科罪惡旣彰宜加貶黜豈可仍疇爵邑尙列台槐此而不懲將何沮勸太宗令百官詳議民部尙書唐儉等議倫罪暴身後恩結生前所歷衆官不可追奪請降贈改謚詔從之於是改謚繆黜其贈官削所食實封子言道尙高祖女淮南長公主官至宋州刺史倫兒子行高以文學知名貞觀中官至禮部郎中

蕭瑀字時文高祖梁武帝曾祖昭明太子祖詵後梁宣帝父肅明帝瑀年九歲封新安郡王幼以孝行聞姊爲

隋晉王妃從入長安聚學屬文端正鯁亮好釋氏常修
梵行每與沙門難及苦空必詣微旨常觀劉孝標辯命
論惡其傷先王之教迷性命之理乃作非辯命論以釋
之大旨以爲人稟天地以生孰云非命然吉凶禍福亦
因人而有若一之於命其蔽已甚時晉府學士柳顧言
諸葛穎見而稱之曰自孝標後數十年間言性命之理
者莫能詆詰今蕭君此論足療劉子膏肓煬帝爲太子
也授太子右千牛及踐祚遷尚衣奉御檢校左翊衛鷹
揚郎將忽遇風疾命家人不卽醫療仍云若天假餘年
因此望爲栖遯之資耳蕭后聞而誨之以爾才智足堪

揚名顯親豈得輕毀形骸而求隱逸若以此致譴則罪在不測病且愈其姊勸勉之故復有仕進志累加銀青光祿大夫內史侍郎既以后弟之親委之機務後數以言忤旨漸見疎斥煬帝至鴈門爲突厥所圍瑀進謀曰如聞始畢託校獵至此義成公主初不知其有違背之心且北蕃夷俗可賀敦知兵馬事昔漢高祖解平城之圍乃是閼氏之力況義成以帝女爲妻必恃大國之援若發一單使以告義成假使無益事亦無損臣又竊聽輿人之誦乃慮陛下平突厥後更事遼東所以人心不一或致挫敗請下明詔告軍中赦高麗而專攻突厥則

百姓心安人自爲戰煬帝從之於是發使詣可賀敦諭旨俄而突厥解圍去於後獲其謀人云義成公主遣使告急於始畢稱北方有警由是突厥解圍蓋公主之助也煬帝又將伐遼東謂羣臣曰突厥狂悖爲寇勢何能爲以其少時未散蕭瑀遂相恐動情不可恕因出爲河池郡守卽日遣之旣至郡有山賊萬餘人寇暴縱橫瑀潛募勇敢之士設奇而擊之當陣而降其衆所獲財畜咸賞有功由是人竭其力薛舉遣衆數萬侵掠郡境瑀要擊之自後諸賊莫敢進郡中復安高祖定京城遣書招之瑀以郡歸國授光祿大夫封宋國公拜民部尙書

太宗爲右元帥攻洛陽以瑀爲府司馬武德元年遷內史令時軍國草創方隅未寧高祖乃委以心腹凡諸政務莫不關掌高祖每臨軒聽政必賜升御榻瑀旣獨孤氏之壻與語呼之爲蕭郎國典朝儀亦責成於瑀瑀孜孜自勉繩違舉過人皆憚之常奏便宜數十條多見納用手敕曰得公之言社稷所賴運智者之策以能成人之美納諫者之言以金寶酬其德今賜金一函以報智者勿爲推退瑀固辭優詔不許其年州置七職務取才望兼美者爲之及太宗臨雍州牧以瑀爲州都督高祖常有敕而中書不時宣行高祖責其遲瑀曰臣大業之

曰見內史宣敕或前後相乖者百司行之不知何所承用所謂易必在前難必在後臣在中書日久備見其事今皇基初構事涉安危遠方有疑恐失機會比每受一敕臣必勘審使與前敕不相乖背者始敢宣行遲晚之憊實由於此高祖曰卿能用心若此我有何憂初瑀之朝也關內產業竝先給勲人至是特還其田宅瑀皆分給諸宗子弟唯留廟堂一所奉烝嘗及平王世充瑀以預軍謀之功加邑二千戶拜尙書右僕射內外考績皆委之司會爲羣僚指南庶務繁總瑀見事時有偏駁而持法稍深頗爲時議所少

七年以熒惑犯右執法避位不許

瑀嘗薦

封倫於高祖高祖以倫爲中書令太宗卽位遷尙書左僕射封倫爲右僕射倫素懷險詖與瑀商量將爲可奏者至太宗前盡變易之於時房元齡杜如晦旣新用事疎瑀親倫瑀心不能平遂上封事論之而辭旨寥落太宗以元齡等功高由是忤旨廢於家俄拜特進太子少師未幾復爲尙書左僕射賜實封六百戶太宗嘗謂瑀曰朕欲使子孫長久社稷永安其理何如瑀對曰臣觀前代國祚所以長久者莫若封諸侯以爲磐石之固秦并六國罷侯置守二世而亡漢有天下郡國參建亦得年餘四百魏晉廢之不能永久封建之法實可遵行太

宗然之始議封建尋坐與侍中陳叔達於上前忤諍聲

色甚厲以不敬免歲餘授晉州都督明年

入拜太常卿

徵授

左光祿大夫兼領御史大夫與宰臣參議朝政瑀多辭

辯每有評議元齡等不能抗然心知其是不用其言瑀

彌怏怏元齡魏徵溫彥博嘗有微過瑀劾之而罪竟不

問因此自失由是罷御史大夫以爲太子少傅不復預

聞朝政六年授特進行太常卿八年爲河南道巡省大

使人有坐當推劾苦未得其情者遂置格置繩以至於

死太宗特免責之九年拜特進復令參預政事太宗嘗

從容謂房元齡曰蕭瑀大業之日進諫隋主出爲河池

郡守應遭割心之禍翻見太平之日北叟失馬事亦難
常瑀頓首拜謝太宗又曰武德六年已後太上皇有廢
立之心而不之定也我當此日不爲兄弟所容實有功
高不賞之懼此人不可以厚利誘之不可以刑戮懼之
其社稷臣也因賜瑀詩曰疾風知勁草板蕩識誠臣又
謂瑀曰卿之守道耿介古人無以過也然而善惡太明
亦有時而失瑀再拜謝曰臣特蒙誠訓又許臣以忠諒
雖死之日猶生之年也魏徵進而言曰臣有逆衆以執
法明主恕之以忠臣有孤特以執節明主恕之以勁昔
聞其言今覩其實蕭瑀不遇明聖必及於難太宗悅其

言十七年與長孫无忌等二十四人並圖形於凌煙閣

是歲立晉王爲皇太子拜瑀太子太保

同中書門下三品

仍知

政事

帝曰三師以德導太子者也禮不尊則無所取法乃詔師入謁太子出門迎拜師答拜每門讓乃入

師坐然後坐書前後著名稱惶恐

太宗之伐遼東也以洛邑衝要襟帶

關河以瑀爲洛陽宮守車駕自遼還請解太保仍同中

書門下太宗以瑀好佛道嘗資繡佛像一軀并繡瑀形

狀於佛像側以爲供養之容又賜王褒所書大品般若

經一部并賜袈裟以充講誦之服焉瑀嘗稱元齡已下

同中書門下內臣悉皆朋黨比周無至心奉上累獨奏

云此等相與執權有同膠漆陛下不細諳知但未反耳

太宗謂瑀曰爲人君者驅駕英材推心待士公言不亦甚乎何至如此太宗數日謂瑀曰知臣者莫若君夫人不可求備自當舍其短而用其長朕雖才謝聰明不應頓迷臧否因數爲瑀信誓瑀旣不自得而太宗積久銜之終以瑀忠貞居多而未廢也會瑀請出家太宗謂曰甚知公素愛桑門今者不能違意瑀旋踵奏曰臣頃思量不能出家太宗以對羣臣吐言而取舍相違心不能平瑀尋稱足疾時詣朝堂又不入見太宗謂侍臣曰瑀豈不得其所乎而自嫌如此遂手詔曰朕聞物之順也雖異質而成功事之違也亦同形而罕用是以舟浮櫂舉可濟千

里之川轅引輪停不越一毫之地故知動靜相循易爲務曲直相反難爲功况乎上下之宜君臣之際者矣朕以無明於元首期託德於股肱思欲去僞歸真除澆反樸至於佛教非意所遵雖有國之常經固弊俗之虛術何則求其道者未驗福於將來修其教者翻受辜於旣往至若梁武窮心於釋氏簡文銳意於法門傾帑藏以給僧祇殫人力以供塔廟及乎三淮沸浪五嶺騰煙假餘息於熊蹯引殘魂於雀鷲子孫覆亡而不暇社稷俄頃而爲墟報施之徵何其謬也而太子太保宋國公瑀踐覆車之餘軌襲亡國之遺風棄公就私未明隱顯之

際身俗口道莫辯邪正之心修累葉之殃源祈一躬之
福本上以違忤君主下則扇習浮華往前朕謂張亮云
卿既事佛何不出家瑀乃端然自應請先入道朕卽許
之尋復不用一迴一惑在於瞬息之間自可自否變於
帷展之所乖棟梁之大體豈具瞻之量乎朕猶隱忍至
今瑀尙全無悛改宜卽去茲朝闕出牧小藩可商州刺
史仍除其封二十一年徵授金紫光祿大夫復封宋國
公從幸玉華宮遭疾薨於宮所年七十四太宗聞而輟
膳高祖祖字誤疑是宗字爲之舉哀遣使弔祭太常諡曰肅太
宗曰易名之典必考其行瑀性多猜貳此諡失於不直

更宜擴實改謚曰貞褊公冊贈司空荊州都督賜東園祕器陪葬昭陵臨終遺書曰生而必死理之常分氣絕後可著單衣一通以充小斂棺內施單席而已冀其速朽不得別加一物無假卜曰惟在速辦自古賢哲非無等例爾宜勉之諸子遵其遺志斂葬儉薄

子銳嗣尙太宗女襄城公主歷太常卿

新書少卿

汾州刺史

公主雅有禮度太宗每令諸公主凡厥所爲皆視其楷則又令所司別爲營第公主辭曰婦人事舅姑如事父母若居處不同則定省多闕再三固讓乃止令於舊宅而改創焉永徽初公主薨詔葬昭陵

瑀兄璟亦有學行武德中爲黃門侍郎累轉祕書監封
蘭陵縣公貞觀中卒贈禮部尙書

瑀兄子鈞隋遷州刺史梁國公珣之子也博學有才望
貞觀中累除中書舍人甚爲房元齡魏徵所重永徽二
年歷遷諫議大夫兼宏文館學士時有左武侯別駕盧
文操踰垣盜左藏庫物高宗以別駕職在糾繩身行盜
竊命有司殺之鈞進諫曰文操所犯情實難原然恐天
下聞之必謂陛下輕法律賤人命任喜怒貴財物臣之
所職以諫爲名愚衷所懷不敢不奏帝謂曰卿職在司
諫能盡忠規遂特免其死罪顧謂侍臣曰此乃真諫議

也尋而太常樂工宋四通等爲宮人通傳信物高宗特令處死乃遣附律鈞上疏言四通等犯在未附律前不合致死手詔曰朕聞防禍未萌先賢所重宮闕之禁其可漸歟昔如姬竊符朕用爲永鑒不欲今茲自彰其過所搦憲章想非濫也但朕翹心紫禁思覲引裾側席朱楹冀旌折檻今乃喜得其言特免四通等死遠處配流鈞尋爲太子率更令兼崇賢館學士顯慶中卒所撰韻旨二十卷有集三十卷行於代子瓘官至渝州長史母終以毀卒瓘子嵩別有傳

鈞兄子嗣業少隨祖姑隋煬帝后入於突厥貞觀九年

歸朝以深識蕃情充使統突厥之衆累轉鴻臚卿兼單于都護府長史調露中單于突厥反叛嗣業率兵戰敗高宗責曰我不殺薛仁貴郭待封故使爾至此然爾門與我家有雅舊故貸死乃流桂州配流嶺南而死

新書贊曰梁蕭氏興江左實有功在民厥終無大惡以寢微而亡故餘祉及其後裔自瑀逮邁凡八葉宰相名德相望與唐盛衰世家之盛古未有也

裴矩字宏大河東聞喜人祖佗後魏東荊州刺史父訥之北齊太子舍人矩襁褓而孤爲伯父讓之所鞠及長博學早知名仕齊爲高平王文學齊亡隋文帝爲定州總管召補記室甚親敬之

以母憂去職

文帝卽位遷給事郎

直內史省奏舍人事伐陳之役領元帥記室及陳平晉

王廣令矩與高頴收陳圖籍歸之祕府

江左平詔矩巡撫嶺南未行而

高智慧等亂道不通帝難其遣矩請速進許之次南康得兵數千人是時俚帥王仲宣偪廣州遣別將圍東衡

州矩與將軍鹿愿赴之賊立九壁屯大庾嶺矩進擊破之賊懼釋東衡州之圍據愿長嶺又擊破之斬其帥自

南海趣廣州仲宣懼潰去綏集二十餘州承制署渠帥為刺史縣令還報帝大悅詔升殿勞苦之拜開府尚書

喜縣公賜資異等遷累內史侍郎時突厥強盛都藍與突利構難屢犯塞詔太平公史萬歲為行軍總管出定

襄道以矩為長史破達頭可汗而萬歲誅矩功不見錄還為尚書左丞累遷吏部侍郎以

事免大業初西域諸蕃款張掖塞與中國互市煬帝遣

矩監其事矩知帝方勤遠略欲并吞夷狄乃訪西域風

俗及山川險易君長姓族物產服章撰西域圖記三卷

合四十四國凡裂三道北道起伊吾徑蒲類鐵勒突厥
可汗廷亂北流河至拂菻中道起高昌焉耆龜茲疏勒
踰葱嶺鑿汗蘇對沙那康曹何大小安穆諸國至波斯
南道起鄯善于闐朱俱波喝觸瞿書槃陀亦度葱嶺涉
護密吐火羅挹怛怛延漕國至北婆羅
門皆竟西海諸國亦自有空道交通

入朝奏之帝大

悅賜物五百段每日引至御座顧問西方之事矩盛言
西方多珍寶及吐谷渾可并之狀帝信之仍委以經略
拜民部侍郎俄遷黃門侍郎參預朝政令往張掖引致
西蕃至者十餘國三年帝有事恒嶽咸來助祭帝將巡
河右復令矩往燉煌矩遣使說高昌王鞠伯雅及伊吾
吐屯設等咱以厚利導使入朝及帝西巡次燕支山高
昌王伊吾設等及西蕃胡二十七國盛服珠玉錦罽焚

香奏樂歌舞相趨謁於道左復令武威張掖士女盛飾
縱觀填咽周亘數十里帝見之大悅及滅吐谷渾蠻夷
納貢諸蕃懾服相繼來庭雖拓地數千里而役戍委輸
之費歲巨萬計中國騷動焉帝以矩有綏懷之略加位
銀青光祿大夫其年帝幸東都矩以蠻夷朝貢者多諷
帝大徵四方奇技作魚龍曼延角觝於洛邑以誇諸戎
狄終月而罷又令三市店肆皆設帷帳盛酒食遣掌蕃
率蠻夷與人貿易所至處悉令邀延就座醉飽而散百官
都人列繪樓幔閣夾道被服光麗屋邸皆供帳池酒林
裁譯長縱蠻夷與民貿易在所令邀飲食相娛樂蠻夷
咨嗟謂中國夷人有識者咸私哂其矯飾焉帝稱矩至
爲仙晨帝所

誠謂宇文述牛宏曰裴矩大識朕意凡所陳奏皆朕之成算朕未發頃矩輒以聞自非奉國用心孰能若是尋令與將軍薛世雄城伊吾而還賜錢四十萬矩因進計縱反間於射匱使潛攻處羅後處羅爲射匱所迫竟隨使者入朝帝甚悅賜矩貂裘及西域珍器從帝巡於塞北幸啟民可汗帳時高麗遣使先通於突厥啟民不敢隱引之見帝矩因奏曰高麗之地本孤竹國也周代以之封箕子漢時分爲三郡晉氏亦統遼東今乃不臣列爲外域故先帝欲征之久矣但以楊諒不肖師出無功當陛下時安得不有事於此使冠帶之境仍爲蠻貊之

鄉乎今其使者朝於突厥親見啟民從化必懼皇靈之

遠暢慮後服之先亡脅令入朝當可致也請面詔其使

還本國遣語其王令速朝覲不然者當率突厥即日誅

之帝納焉高麗不用命始建征遼之策王師臨遼以本

官領虎賁郎將明年復從至遼東兵部侍郎斛斯政亡

入高麗帝令矩兼掌兵部事以前後渡遼功進位右光

祿大夫矩以始畢可汗衆漸盛建請以宗室女嫁叱吉

之稍怨望矩又言突厥淳陁易離間但內多羣胡教導

之臣聞史蜀胡悉尤有謀幸於始畢請殺之帝曰善矩

因詭計召胡受賜斬馬邑下報始畢曰史蜀胡悉背可

汗我所共惡今既誅之始畢知之由是不朝後帝北巡

始畢率騎十萬圍帝鴈門詔矩後從幸江都時盜賊蜂

矩與虞世基宿朝堂待顧問矩結郡縣上

奏不可計矩言於帝帝怒遣詣京師以疾解

及義兵入關屈突通敗問至帝

問矩方略矩曰太原有變京畿不靜遙爲處分恐失事

機唯鑾輿早還方可平定矩見天下將亂恐爲身禍每

遇人盡禮雖至胥吏皆得其歡心時從駕驍果多逃散

矩言於帝曰車駕留此已經二歲人無匹台則不能久

安請聽兵士於此納室私相奔誘者因而配之帝從其

計軍中漸安咸曰裴公之惠也是時帝既昏侈逾甚矩

無所諫諍但悅媚取容而已

宇文化及亂衆劫矩賊皆曰裴黃門無預也既而衆

以秦王子浩爲帝詔矩爲侍中隨而北

宇文化及弑逆署爲尙書右僕射

爲河北道安撫大使化及敗竇建德復以爲尙書右僕射令專掌

選事時建德起自羣盜事無節文矩爲之創定朝儀權

設法律憲章頗備建德大悅每諮訪焉及建德敗矩與

僞將曹旦及建德之妻齎傳國八璽舉山東之地來降

擢殿中侍御史封安邑縣公武德五年拜太子左庶子俄遷太

子詹事令與虞世南撰吉凶書儀參按故實甚合禮度

爲學者所稱至今行之八年兼檢校侍中時突厥數寇邊高祖遣使約西

突厥連和突厥因請昏帝曰彼勢與我絕緩急不爲用奈何矩曰然北虜方熾歲苦邊若權順許以示外援須

我完實更議及太子建成被誅其餘黨尙保宮城欲與

之帝然其計秦王決戰王遣矩曉諭之官兵乃散尋遷民部尙書矩

年且八十而精爽不衰以曉習故事甚見推重太宗初

卽位務止姦吏或聞諸曹案典多有受賂者乃遣人以財物試之有司門令史受餽絹一疋太宗怒將殺之矩進諫曰此人受賂誠合重誅但陛下以物試之卽行極法所謂陷人以罪恐非道德齊禮之義太宗納其言因召百僚謂曰裴矩遂能廷折不肯面從每事如此天下何憂不治貞觀元年卒贈絳州刺史諡曰敬撰開業平陳記十二卷行於代子宣機高宗時官至銀青光祿大夫太子左中護

宇文士及

字仁人

雍州長安人隋右衛大將軍述子化及

弟也開皇末以父勲封新城縣公隋文帝嘗引入臥內

與語奇之令尙煬帝女南陽公主大業中歷尙輦奉御

從幸江都以父憂去職尋起爲鴻臚少卿化及之潛謀

逆亂也以其主壻深忌之而不告旣弑煬帝署爲內史

令

封蜀王

初高祖爲殿內少監時士及爲奉御深自結託

及隨化及至黎陽高祖手詔召之士及亦潛遣家僮間

道詣長安申赤心又因使密貢金環高祖大悅謂侍臣

曰我與士及素經共事今貢金環是其來意也及至魏

縣兵威日蹙士及勸之西歸長安化及不從士及乃與

封倫求於濟北徵督軍糧俄而化及爲竇建德所擒濟

北豪右多勸士及發青齊之衆北擊建德收河北之地

以觀形勢士及不納遂與封倫等來降高祖數之曰汝兄弟率思歸之卒爲入關之計當此之時若得我父子豈肯相存今欲何地自處士及謝曰臣之罪誠不容誅但臣早奉龍顏久存心腹往在涿郡嘗夜中密論時事後於汾陰宮復盡丹赤自陛下龍飛九五臣實傾心西歸所以密申貢獻冀此贖罪耳高祖笑謂裴寂曰此人與我言天下事至今已六七年矣公輩皆在其後時士及妹爲昭儀有寵由是漸見親待授上儀同從太宗平宋金剛以功復封新城縣公妻以壽光縣主仍遷秦王府驃騎將軍又從平王世充竇建德以功進爵郢國公

遷中書侍郎再轉太子詹事

武德八年權檢校侍中兼太子詹事

太宗卽

位代封倫爲中書令真食益州七百戶尋以本官檢校

涼州都督時突厥屢爲邊寇士及欲立威以鎮邊服每

出入陳兵盛爲容衛又折節禮士涼土服其威惠

或告其反

狀無

徵爲殿中監以疾出爲蒲州刺史爲政寬簡吏人

安之數歲入爲右衛大將軍甚見親顧每延入閣中乙

夜方出遇其歸沐仍遣馳召同列莫與爲比然尤謹密

其妻每問向中使召有何樂事士及終無所言

帝嘗玩禁中樹

曰此嘉木也士及從傍美嘆帝正色曰魏徵嘗勸我遠

佞人不識佞人爲誰乃今信然謝曰南衙羣臣面折廷

爭陛下不得舉手今臣幸在左右不少有將順雖貴爲

天子亦何聊帝意解又嘗割肉以餅拭手帝屢目陽若

不肖徐陷之其
機悟率類此

尋錄其功別封一子爲新城縣公在職

七年復爲殿中監加金紫光祿大夫及疾篤太宗親問
撫之流涕貞觀十六年卒贈左衛大將軍涼州都督陪
葬昭陵士及撫幼弟及孤兒子以友愛見稱親戚故人
貧乏者輒遺之然厚自封植衣食服玩必極奢侈諡曰
恭黃門侍郎劉洎駁之曰士及居家侈縱不宜爲恭竟
諡曰縱

史臣曰封倫多揣摩之才有附託之巧黨化及而數煬
帝或有赧顏託士及以歸唐朝殊無愧色當建成之際
事持兩端背蕭瑀之恩奏多異議太宗明主也不見其

心元齡賢相焉尙容其諂狡算醜行死而後彰苟非唐
臨之効唐儉等議則姦人得計矣蕭瑀骨鯁亮直儒術
清明執政隋朝忠而獲罪委質高祖知無不爲及太宗
臨朝房杜用事不容小過欲居成功旣形猜貳之言寧
固或躍之位易名而祇加禍字所幸者猶多奉佛而不
失道情非善也而何謂裴矩方略寬簡士及通變謹密
皆一時之稱也

贊曰封倫揣摩諂詐蕭瑀骨鯁儒術裴矩方略寬簡士
及通變謹密

新書贊曰封倫裴矩其姦足以亡隋其知反以佐唐
何哉唯姦人多才能與時而成敗也妖禽孽狐當晝

則伏自如得夜乃爲之祥若倫僞行匿情死乃暴聞
免兩觀之誅幸矣太宗知士及之佞爲游言自解亦
不能斥彼中材之主
求不惑於佞難哉

唐書卷第一百十四

唐書卷第一百十五

列傳十五

高祖諸子

隱太子建成

楊文幹
宇文穎從新書增

衛王元霸

巢王元吉

楚王智雲

子靈龜

荆王元景

漢王元昌

鄆王元亨

周王元方

徐王元禮

子茂
茂子璿
璿子延年

韓王元嘉

子譔
譔從新書增

彭王元則

鄭王元懿

霍王元軌

子緒

虢王鳳

子融

孫邕

道王元慶

鄧王元裕

舒王元名

魯王靈夔

子藹
道堅

藹子
道遠

江王元祥

密王元曉

滕王元嬰

高祖二十二男太穆皇后生隱太子建成及太宗衛王
元霸巢王元吉萬貴妃生楚王智雲尹德妃生鄴王元
亨莫嬪生荆王元景孫嬪生漢王元昌宇文昭儀生韓
王元嘉魯王靈夔崔嬪生鄧王元裕楊嬪生江王元祥
小楊嬪生舒王元名郭婕妤生徐王元禮劉婕妤生道
王元慶楊美人生虢王鳳張美人生霍王元軌張寶林
生鄭王元懿柳寶林生滕王元嬰王才人生彭王元則

魯才人生密王元曉張氏生周王元方

隱太子建成

小字毗沙門

高祖長子也大業末高祖捕賊汾

晉建成攜家屬寄於河東義旗初建遣使密召之建成

與巢王元吉間行赴太原建成至高祖大喜拜左領軍

大都督封隴西郡公引兵略西河郡從平長安義寧元

年冬隋恭帝拜唐國世子開府置僚屬二年授撫軍大

將軍東討元帥將兵十萬

新書萬人

徇洛陽及還恭帝授尚

書令武德元年立爲皇太子二年司竹羣盜祝山海有

衆一千自稱護鄉公詔建成帥將軍桑顯和進擊山海

平之時涼州人安興貴殺賊帥李軌以衆來降令建成

往原州應接之時甚暑而馳獵無度士卒不堪其勞逃者過半高祖憂其不閑政術每令習時事自非軍國大務悉委決之又遣禮部尙書李綱民部尙書鄭善果俱爲宮官與參謀議四年稽胡酋帥劉仝成擁部落數萬人爲邊害又詔建成率師討之軍次鄜州與仝成軍遇擊大破之斬首數百級虜獲千餘人建成設詐放其渠帥數十人竝授官爵令還本所招慰羣胡仝成與胡中大帥亦請降建成以胡兵尙衆恐有變將盡殺之乃揚言增置州縣須有城邑悉課羣胡執板築之具會築城所陰勒兵士皆執之仝成聞有變奔於梁師都竟誅降

胡六千餘人

嘗巡行北邊遇賊四百出降悉馘其耳縱之

時太宗功業日盛

高祖私許立爲太子建成密知之乃與齊王元吉潛謀

作亂及劉黑闥重反王珪魏徵謂建成曰殿下但以地

居嫡長爰踐元良功績旣無可稱仁聲又未遐布而秦

王勲業克隆威震四海人心所向殿下何以自安今黑

闥率破亡之餘衆不盈萬加以糧運限絕瘡痍未瘳若

大軍一臨可不戰而擒也願請討之且以立功深自封

植因結山東英俊建成從其計遂請討劉黑闥擒之而

旋

黑闥敗洺水建成問徵曰山東其定乎對曰黑闥雖敗殺傷太甚其魁黨皆懸名處死妻子係虜欲降無

由雖有赦令獲者必戮不大蕩宥恐殘賊嘯結民未可

安旣而黑闥復振廬江王瑗棄洺州山東亂命齊王元

吉討之有詔降者赦罪衆不信建成至獲俘皆撫遣之百姓忻悅賊懼夜奔兵追戰黑闥衆猶盛乃縱囚使相告曰襁而甲還鄉里若妻子獲者旣已時高祖晚生諸釋矣衆乃散或縛其渠長降遂擒黑闥

王諸母擅寵椒房親戚竝分事宮府競求恩惠太宗每總戎律唯以撫接才賢爲務至於參請妃媛素所不行初平洛陽高祖遣貴妃等馳往東都選閱宮人及府庫珍物因私有求索兼爲親族請官太宗以財簿先已封奏官爵皆酬有功竝不允許因此銜恨彌切時太宗爲陝東道行臺詔於管內得專處分淮安王神通有功太宗乃給田數十頃後婕妤張氏之父令婕妤私奏以乞其地高祖手詔賜焉神通以教給在前遂不肯與婕妤

矯奏曰敕賜妾父地秦王奪之以與神通高祖大怒攘
袂責太宗曰我詔敕不行爾之教命州縣卽受他日高
祖呼太宗小名謂裴寂等此兒典兵旣久在外專制爲
讀書漢所教非復我昔日子也又德妃之父尹阿鼠所
爲橫恣秦王府屬杜如晦行經其門阿鼠家僮數人牽
如晦墜馬毆擊之罵云汝是何人敢經我門而不下馬
阿鼠或慮上聞乃令德妃奏言秦王左右凶暴凌轢妾
父高祖又怒謂太宗曰爾之左右欺我妃嬪之家一至
於此況凡人百姓乎太宗深自辨明卒不被納

高祖嘗召諸王

燕秦王威母之不及有天

下也偶獨泣帝顧不樂 妃嬪等因奏言至尊萬歲後

秦王得志母子定無子遺因悲泣哽咽又云東宮慈厚

必能養育妾母子高祖惻愴久之自是於太宗恩禮漸

薄廢立之心亦以此定建成元吉轉蒙恩寵突厥入寇帝議遷都

秦王古諫止建成見帝曰秦王欲外禦寇自武德初高

祖遷都議以久其兵而謀篡奪帝寢不悅令太宗居西宮之承乾殿元吉居武德殿後院與上

臺東宮晝夜竝通更無限隔皇太子及二王出入上臺

皆乘馬攜弓刀雜用之物相遇則如家人之禮由是皇

太子令及秦齊二王教與詔敕竝行百姓惶惑莫知準

的建成元吉又外結小人內連嬖幸高祖所寵張婕妤

尹德妃皆與之淫亂復與諸公主及六宮親戚驕恣縱

橫并兼田宅侵奪犬馬同惡相濟掩蔽聰明苟行已志

唯以甘言諛辭承侯顏色建成乃私召四方驍勇并募

長安惡少年二千餘人畜爲宮甲分屯左右長林門號

爲長林兵

又令左虞候率可達志募幽州突厥兵三百內宮中將攻西宮或告於帝帝召建成責之

乃流達志

及高祖幸仁智宮留建成居守建成先令慶州

總管楊文幹募健兒送京師欲以爲變又遣郎將爾朱

煥校尉橋公山齋甲以賜文幹令起兵共相應接公山

煥等行至幽鄉懼罪馳告其事

寧州人杜鳳亦上變高祖託以他

事手詔追建成詣行在所

帝以建成首謀未忍治卽詔捕王珪魏徵及左衛率韋挺

舍人徐師暮左衛車騎馮世立欲殺之以薄太子罪乃手詔召建成建成懼不敢往師暮勸遂舉兵詹事主簿

趙宏志諫建成損車服徑往謝罪乃請行在所未至屏官屬徑入謁既至高祖大怒建成

叩頭謝罪奮身自投於地幾至於絕其夜置之幕中令

殿中監陳萬福防禦而楊文幹遂舉兵反

帝遣司農卿字文穎驛召

文幹元吉陰結穎使告文幹文幹遽率兵反陷寧州帝驚以宮近賊夜率衛士南趣山行十餘里明乃還宮

高祖馳使召太宗謀之太宗曰文幹小豎狂悖起兵州府官

司已應擒剿縱其假息時刻但須遣一將耳高祖曰文幹事

連建成恐應之者衆汝宜自行還立汝爲太子吾不能

效隋文帝誅殺骨肉廢建成封作蜀王地既僻小易制

若不能事汝亦易取耳

秦王率衆趣寧州文幹爲其下所殺以其首降執宇文穎送京

師太宗既行元吉及四妃更爲建成內請封倫又外爲

遊說高祖意便頓改遂寢不行復令建成還京居守唯責以兄弟不能相容歸罪於中允王珪左衛率韋挺及天策兵曹杜淹等竝流之嶠州後又與元吉謀行酖毒引太宗入宮夜宴旣而太宗心中暴痛吐血數升淮安王神通狼狽扶還西宮高祖幸第問疾因敕建成秦王素不能飲更勿夜聚乃謂太宗曰發跡晉陽本是汝計克平宇內是汝大功欲升儲位汝固讓不受以成汝美志建成自居東宮多歷年所今復不忍奪之觀汝兄弟是不和同在京邑必有忿競汝還行臺居於洛陽自陝以東悉宜主之仍令汝建天子旌旗如梁孝王故事太

宗泣而奏曰今日之授實非所願不能遠離膝下言訖
嗚咽悲不自勝高祖曰昔陸賈漢臣尙有遞過之事况
吾四方之主天下爲家東西兩宮塗路咫尺憶汝卽往
無勞悲也及將行建成元吉相與謀曰秦王今往洛陽
旣得土地甲兵必爲後患留在京師制之一匹夫耳密
令數人上封事曰秦王左右多是東人聞往洛陽非常
忻躍觀其情狀自今一去不作來意高祖於是遂停是
後日夜陰與元吉連結後宮譖訴愈切高祖惑之太宗
懼不知所爲李靖李勣等數言大王以功高被疑靖等
請申犬馬之力封倫亦潛勸太宗圖之竝不許倫反言

於高祖曰秦王恃有大勲不服居太子之下若不立之
願早爲之所又說建成作亂曰夫爲四海者不顧其親
漢高乞義此之謂矣九年突厥犯邊詔元吉率師拒之
元吉因兵集將與建成剋期舉事長孫无忌房元齡杜
如晦尉遲敬德侯君集等日夜固爭曰事急矣若不行
權道社稷必危周公聖人豈無情於骨肉爲存社稷大
義滅親今大王臨機不斷坐受屠戮於義何成若不見
聽无忌等將竄身草澤不得居王左右太宗然其計六
月三日密奏建成元吉淫亂後宮因自陳曰臣於兄弟
無絲毫所負今欲殺臣似爲世充建德報讐臣今枉死

永達君親魂歸地下實亦耻見諸賊高祖省之愕然報

曰明日當勘問汝宜早參

張婕妤馳告建成乃召元吉謀曰請勒宮甲託疾不朝建

成曰善然不共入朝事何由知遲明乘馬至元武門四日太宗將左右九人至元

武門自衛高祖已召裴寂蕭瑀陳叔達封倫宇文士及

竇誕顏師古等欲令窮覈其事建成元吉行至臨湖殿

覺變卽迴馬將東歸宮府太宗隨而呼之元吉馬上張

弓再三不發太宗乃射之建成應弦而斃元吉中流矢

而走尉遲敬德殺之俄而東宮及齊府精兵二千人結

陣馳攻元武門守門兵仗拒之不得入良久接戰流矢

及於內殿太宗左右數百騎來赴難建成等兵遂敗散

高祖大驚謂裴寂等曰今日之事如何蕭瑀陳叔達進
曰臣聞內外無限父子不親當斷不斷反受其亂建成
元吉義旗草創之際並不預謀建立已來又無功德常
自懷憂相濟爲惡釁起蕭牆遂有今日之事秦王功蓋
天下率土歸心若處以元良委之國務陛下如釋重負
蒼生自然乂安高祖曰善此亦吾之夙志也乃命召太
宗而撫之曰近日以來幾有投杼之惑太宗哀號久之
建成死時年三十八長子太原王承宗早卒次子安陸
王承道河東王承德武安王承訓汝南王承明鉅鹿王
承義並坐誅

詔除建成屬籍其黨疑懼更相合廬江王
瑗遂反乃下詔建成元吉瑗支黨不得相

告許由太宗卽位追封建成爲息王諡曰隱以禮改葬

是遂安

詔東宮舊臣皆會

太宗於宜秋門哭之甚哀仍以皇子趙

王福爲建成嗣十六年五月又追贈皇太子諡仍依舊

宇文穎者代人自李密所來降爲農圃監封化政郡公

性貪庸與元吉厚善故預文幹謀事敗帝責曰朕以文

幹叛故遣卿乃同逆耶穎無以對斬之

衛王元霸

字大德

高祖第三子也早薨無子武德元年追

贈衛王諡曰懷

贈秦州總管司空

四年封太宗子泰爲宜都王

以奉其祀以禮改葬

葬於正陽

太子以下送於郭外泰後徙

封於越又以宗室贈西平王瓊之子保定爲嗣貞觀五

年薨無子國除

巢王元吉

小字三胡

高祖第四子也義師起授太原郡守封

姑臧郡公尋進封齊國公授十五郡諸軍事鎮北大將

軍留鎮太原許以便宜行事武德元年進爵爲王授并

州總管

初元吉生太穆皇后惡其貌不舉侍媼陳善意私乳之及長猜驚好兵居邊久益驕侈嘗令奴

客諸妾數百人被甲習戰相擊刺死傷甚衆後元吉二

中創善意止之元吉恚命壯士拉死私諡慈訓夫人

年劉武周南侵汾晉詔遣右衛將軍宇文歆助元吉守

并州元吉性好畋獵載網罟三十餘兩嘗言我寧三日

不食不能一日不獵又縱其左右攘奪百姓歆頻諫不

納乃上表曰王在州之日多出微行常共寶誕遊獵蹂

踐穀稼放縱親昵公行攘敗境內六畜因之殆盡當衢

而射觀人避箭以爲笑樂分遣左右戲爲攻戰至相擊刺毀傷致死夜開府門宣淫他室百姓怨毒各懷憤歎以此守城安能自保元吉竟坐免又諷父老詣闕請之尋令復職時劉武周率五千騎至黃蛇嶺元吉遣車騎將軍張達以步卒百人先嘗之達以步卒少固請不行元吉強遣之至則盡沒於賊達憤怒因引武周攻陷榆次進逼并州元吉大懼給其司馬劉德威曰卿以老弱守城吾以強兵出戰因夜出兵攜其妻妾棄軍奔還京師并州遂陷高祖怒甚謂禮部尙書李綱曰元吉幼小未習時事故遣寶誕宇文歆輔之強兵數萬食支十年

起義興運之基一朝而棄宇文歆首畫此計我當斬之
綱曰賴歆令陛下不失愛子臣以爲有功高祖問其故
綱對曰罪由竇誕不能規諷致令軍人怨憤又齊王年
少肆行驕逸放縱左右侵漁百姓誕曾無諫止乃隨順
揜藏以成其釁此誕之罪宇文歆論情則疎向彼又淺
王之過失悉以聞奏且父子之際人所難言而歆言之
豈非忠懇今欲誅罪不錄其心臣愚竊以爲過翼日高
祖召綱入升御坐謂曰今我有公遂使刑罰不濫元吉
自惡結怨於人歆旣曾以表聞誕亦焉能禁制皆非其
罪也尋加授元吉侍中襄州道行臺尙書令稷州刺史

四年太宗征竇建德留元吉與屈突通圍王世充於東
都世充出兵拒戰元吉設伏擊破之斬首八百級生擒
其大將樂仁昉甲士千餘人世充平拜司空餘官如故
加賜袞冕之服前後部鼓吹樂二部班劍二十人黃金
二千斤與太宗各聽三鑪鑄錢以自給六年加授隰州
總管時秦王有功而太子不為中外所屬元吉喜亂欲
并圖之乃構於太子曰秦王功業日隆為上所愛
殿下雖為太子位不安不早計旋踵受禍矣請及與建
為殿下殺之太子不忍元吉數諷不已許之
成連謀各募壯士多匿罪人記室參軍榮九思為詩刺
之曰丹青飾成慶玉帛禮
專諸元吉見之弗悟也其典籤裴宣儼免官往復內結
事秦府元吉疑事泄鳩殺之自是人莫敢言
宮掖遞加稱譽又厚賂中書令封倫以為黨助由是高

祖頗疎太宗而加愛元吉太宗嘗從高祖幸其第元吉
伏其護軍宇文寶於寢內將以刺太宗建成恐事不果
而止之元吉愠曰爲兄計耳於我何害九年轉左衛大
將軍尋進位司徒兼侍中并州大都督隰州都督稷州
刺史竝如故高祖將避暑大和宮二王當從元吉謂建
成曰待至宮所當興精兵襲取之置土窟中惟開一孔
以通飲食耳會突厥郁射設屯軍河南入圍烏城建成
乃薦元吉代太宗督軍北討仍令秦府驍將秦叔寶尉
遲敬德程知節段志元等竝與同行又追秦府帳簡閱
驍勇將奪太宗兵以益其府又譖杜如晦房元齡逐令

歸第高祖知其謀而不制元吉因密請加害太宗高祖
曰是有定四海之功罪迹未見一旦欲殺何以爲辭元
吉曰秦王嘗違詔敕初平東都之日偃蹇顧望不急還
京分散錢帛以樹私惠違戾如此豈非反逆但須速殺
何患無辭高祖不對元吉遂退建成謂元吉曰旣得秦
王精兵統數萬之衆吾與秦王至昆明池於彼宴別令
壯士拉之於幕下因云暴卒主上諒無不信吾當使人
進說令付吾國務正位已後以汝爲太弟敬德等旣入
汝手一時坑之孰敢不服率更丞王晙聞其謀密告太
宗太宗召府僚以告之皆曰大王若不正斷社稷非唐

所有若使建成元吉肆其毒心羣小得志元吉狼戾終
亦不事其兄往者護軍薛寶上齊王符籙云元吉合成
唐字齊王得之喜曰但除秦王取東宮如反掌耳爲亂
未成豫懷傾奪以大王之威襲二人如拾地芥太宗遲
疑未決衆又曰大王以舜爲何如人也曰濬哲文明溫
恭允塞爲子孝爲君聖焉可議之乎府僚曰向使舜浚
井不出自同魚鼈之斃焉得爲孝子乎塗廩不下便成
煨燼之餘焉得爲聖君乎小杖受大杖避良有以也太
宗於是定計誅建成及元吉元吉死時年二十四有五
子梁郡王承業漁陽王承鸞普安

新書晉
安誤

王承獎江夏

王承裕義陽王承度並坐誅尋詔絕建成元吉屬籍太宗踐祚追封元吉爲海陵郡王諡曰刺以禮改葬貞觀十六年又追封巢王諡如故復以曹王明爲元吉後

楚王智雲高祖第五子也母曰萬貴妃性恭順特蒙高祖親禮宮中之事皆諮稟之諸王妃主莫不推敬後授楚國太妃薨陪葬獻陵智雲本名稚銓大業末從高祖於河東及義師將起隱太子建成潛歸太原以智雲年小委之而去因爲吏所捕送於長安爲陰世師所害年十四義寧元年贈尚書左僕射楚國公武德元年追封楚王諡曰哀無子三年以太宗子寬爲嗣寬薨貞觀二

年復以濟南公世都子靈龜嗣焉靈龜永徽中歷魏州
刺史政尚清嚴姦盜屏跡又開永濟渠入於新市以控
引商旅百姓利之卒官子福嗣嗣降爵爲公儀鳳中卒
於右威衛將軍子承況神龍中爲右羽林將軍與節愍
太子同舉兵入元武門爲亂兵所殺

荆王元景高祖第六子也武德三年封爲趙王八年授
安州都督貞觀初歷遷雍州牧右驍衛大將軍十年徙
封荆王授荆州都督十一年定制元景等爲代襲刺史
詔曰皇王受命步驟之迹以殊經籍所紀質文之道匪
一雖治亂不同損益或異至於設官司以制海內建藩

屏以輔王室莫不明其典章義存於致治崇其賢戚志在於無疆朕以寡昧丕承鴻緒寅畏三靈憂勤百姓考明哲之餘論求經邦之長策帝業之重獨任難以成務天下之曠因人易以獲安然則侯伯肇於自昔州郡始於中代聖賢異術沿革隨時復古則義難頓從尋今則事不盡理遂規模周漢斟酌曹馬採按部之嘉名參建侯之舊制共治之職重矣分土之實存焉已有制書陳其至理繼世垂範貽厥後昆維城作固同符前烈荊州都督荆王元景梁州都督漢王元昌徐州都督徐王元禮潞州都督韓王元嘉遂州都督彭王元則鄭州刺史

鄭王元懿絳州刺史霍王元軌虢州刺史虢王鳳豫州
刺史道王元慶鄧州刺史鄧王元裕壽州刺史舒王元
名幽州都督燕王靈夔蘇州刺史許王元祥安州都督
吳王恪相州都督魏王泰齊州都督齊王裕益州都督
蜀王愔襄州刺史蔣王憚揚州都督越王貞并州都督
晉王某秦州都督紀王慎等或地居旦奭夙聞詩禮或
望及間平早稱才藝竝爵隆土宇寵兼車服誠孝之心
無忘於造次風政之舉克著於朞月宜冠恒冊祚以休
命其所任刺史咸令子孫代代承襲尋又罷代襲之制
元景久之轉鄜州刺史高宗卽位進位司徒加實封通

前滿一千五百戶永徽二年坐與房遺愛謀反

坐子則與往還

繫獄時吳王亦抵罪高宗謂大臣曰朕欲從公句叔父及兄死兵部侍郎崔敦禮曰陛下雖申恩不可詘天下

法賜死國除後追封沈黎王備禮改葬以渤海王奉慈

子長沙爲嗣降爵爲侯神龍初追復爵土并封其孫逃

新書名爲嗣荆王尋薨元逃誤無國除

漢王元昌高祖第七子也少好學善隸書武德三年封

爲魯王貞觀五年授華州刺史轉梁州都督十年改封

漢王元昌在州頗違憲法太宗手敕責之初不自咎更

懷怨望知太子承乾嫉魏王泰之寵乃相附託圖爲不

軌十六年元昌來朝京師承乾頻召入東宮夜宿因謂

承乾曰願殿下早爲天子近見御側有一宮人善彈琵琶事平之日當望垂賜承乾許諾又刻臂出血以帛拭之燒作灰和酒同飲共爲信誓潛伺間隙十七年事發太宗弗忍加誅特敕免死大臣高士廉李世勣等奏言王者以四海爲家以萬姓爲子公行天下情無獨親元昌包藏兇惡圖謀逆亂觀其指趣察其心府罪深燕旦釁甚楚英天地之所不容人臣之所切齒五刑不足申其罰九死無以當其愆而陛下情屈至公恩加梟獍欲開疎網漏此鯨鯢臣等有司期不奉制伏願敦師憲典誅此兇慝順羣臣之願效鷹鷂之心則吳楚七君不幽

歎於往漢管蔡二叔不沉恨於有周太宗事不獲已乃
賜元昌自盡於家妻子籍沒國除

酆王元亨高祖第八子也武德三年受封貞觀二年授
散騎常侍拜金州刺史及之藩太宗以其幼小甚思之
中路賜以金盞遣使爲之設宴六年薨諡曰悼無子國除
周王元方高祖第九子也武德四年受封貞觀二年授
散騎常侍三年薨贈左光祿大夫無子國除

徐王元禮高祖第十子也少恭謹善騎射武德四年封
鄭王貞觀六年賜實封七百戶授鄭州刺史徙封徐王
遷徐州都督十七年轉絳州刺史以善政聞太宗降璽

書勞勉賜以錦綵二十三年加實封千戶永徽四年加授司徒兼潞州刺史咸亨三年薨贈太尉冀州大都督

諡曰康陪葬獻陵

子淮南王茂嗣茂險薄無行元禮姬趙氏有美色及元禮遇疾茂遂逼之元禮知而切加責讓茂乃屏斥元禮侍衛斷其藥膳乃云既得五十年爲王更何煩服藥竟以餒終上元中事洩配流振州而死神龍初又封茂子瓘爲嗣徐王景龍四年加銀青光祿大夫開元中除宗正員外卿卒子延年嗣開元二十六年封嗣徐王除員外洗馬天寶初拔汗那王入朝廷年將嫁女與之爲右

相李林甫所奏貶文安郡別駕彭城長史坐贓貶永嘉
司士至德初餘杭郡司馬卒永泰元年女壻黔中觀察
使趙國珍入朝請以延年子前施州刺史諷爲嗣因封
嗣徐王

韓王元嘉高祖第十一子也母宇文昭儀隋左武衛大
將軍述之女也早有寵於高祖高祖初卽位便欲立爲
皇后固辭不受元嘉少以母寵特爲高祖所愛自登極
晚生皇子無及之者武德四年封宋王徙封徐王貞觀
六年賜實封七百戶授潞州刺史時年十五在州聞太
妃有疾便涕泣不食及京師發喪哀毀過禮太宗嗟其

至性屢慰勉之九年授右領軍大將軍十年改封韓王

授潞州

新書
滑州

都督二十三年加實封滿千戶元嘉少好

學聚書至萬卷又採碑文古跡多得異本閭門修整有

類寒素士大夫與其弟靈夔甚相友愛兄弟集見如布

衣之禮其修身潔已內外如一當代諸王莫能及者唯

霍王元軌抑其次焉高宗末元嘉轉澤州刺史及天后

臨朝攝政欲順物情乃進授元嘉爲太尉定州刺史霍

王元軌爲司徒青州刺史舒王元名爲司空隆州刺史

魯王靈夔爲太子太師蘇州刺史越王貞爲太子太傅

安州都督紀王慎爲太子太保竝外示尊崇實無所綜

理垂拱中元嘉為絳州刺史其後漸將誅戮宗室諸王不附已者元

嘉大懼與其子通州刺史黃公譔及越王貞父子謀起

兵未發會武后詔宗室朝明堂元嘉遣使告諸王曰大享後太后必盡誅諸王不如先事起不然李氏無種矣乃為中宗詔於是皇宗國戚內外相連者甚廣遣使

督諸王發兵督諸王發兵於是皇宗國戚內外相連者甚廣遣使

報貞及貞子瑯琊王沖曰四面同來事無不濟沖與諸

道計料未審而先發兵倉卒唯貞應之以兵五千攻濟州諸道

莫有赴者故其事不成元嘉坐誅元嘉至京師謀泄后逼令自殺年七十詔

改氏元嘉魯王越王為虺

譔少以文才見知諸王子中與瑯琊王沖為一時之秀

譔工為辭章孟利貞嘗稱其文曰劉鄰之周思茂凡所不過也出為通州刺史辭疾歸且謀應越王也

結交皆當代名士時天下犯罪籍沒者甚衆唯冲與譔父子書籍最多皆文句詳定祕閣所不及神龍初追復元嘉爵土并封其第五子訥爲嗣韓王官至員外祭酒開元十七年卒元嘉六子長子訓高祖時封潁川王早卒次子誼封武陵王官至濮州刺史譔上黨公譔通音律歷杭州別駕與譔俱死開元中封訥子叔璩爲嗣韓王國子員外司業子煒嗣建

中中改王鄆後懿宗以鄆王卽位復改嗣韓王云

彭王元則

字彛

高祖第十二子也武德四年封荆王貞觀

七年授豫州

新書
婺州

刺史十年改封彭王除遂州都督尋

坐章服奢僭免官十七年拜澧州刺史更折節勵行頗

著聲譽永徽二年薨高宗爲之廢朝三日贈司徒荊州都督陪葬獻陵諡曰思發引之日高宗登望春宮望其靈車哭之甚慟無子以霍王元軌子絢嗣龍朔中封南昌王子志陳神龍初封嗣彭王景龍初加銀青光祿大夫開元中宗正卿同正員卒

鄭王元懿高祖第十三子也頗好學武德四年封滕王貞觀七年授兗州刺史賜實封六百戶十年改封鄭王歷鄭潞二州刺史二十三年加實封滿千戶總章中累授絳州刺史數斷大獄甚有平允之譽高宗嘉之降璽書褒美賜物三百段咸亨四年薨贈司徒荊州大都督

謚曰惠陪葬獻陵子子璫上元初封爲嗣鄭王官至鄂

州刺史神龍初又封璫嫡子希言爲嗣鄭王景龍四年

嗣鄭王希言等共一十四人竝加銀青光祿大夫開元

中右金吾大將軍天寶初再爲太子詹事同正員卒弟

言生二子曰自仙翺自仙爲楚州別駕生夷簡翺爲陳留公生宗閔敬弟琳安德郡公生擇言擇言生勉勉宗

閔夷簡皆位宰相別有傳時稱小鄭王後亦曰鄭惠王後以別鄭王亮云

霍王元軌高祖第十四子也少多才藝高祖甚奇之武

德六年封蜀王八年徙封吳王貞觀初太宗嘗問羣臣

曰朕子弟孰賢侍中魏徵對曰臣愚闇不盡知其能唯

吳王數與臣言未嘗不自失上曰朕亦器之卿以爲前

代誰比徵曰經學文雅亦漢之間平也由是寵遇彌厚
因令娶徵女焉從太宗遊獵遇羣獸命元軌射之矢不
虛發太宗撫其背曰汝武藝過人恨今無所施耳當天
下未定我得汝豈不美乎七年拜壽州刺史賜實封六
百戶高祖崩去職毀瘠過禮自後嘗布衣示有終身之
戚焉每至忌辰輒數日不食十年改封霍王授絳州刺
史尋轉徐州刺史元軌前後爲刺史至州唯閉閣讀書
吏事責成於長史司馬謹慎自守與物無忤爲人不妄
交在徐州唯與處士劉元平爲布衣之交人或問元平
王之長元平答曰無長問者怪而復問之元平曰夫人

有短所以見其長至於霍王無所不備吾何以稱之哉
二十三年加實封滿千戶爲定州刺史突厥來寇元軌
令開門偃旗虜疑有伏懼而宵遯州人李嘉運與賊連
謀事泄高宗令收按其黨元軌以強寇在境人心不安
唯殺嘉運餘無所及因自劾違制上覽表大悅謂使曰
朕亦悔之向無王則失定州矣有王文操遇賊而二子
鳳賢遂以身蔽捍文操獲全二子皆死縣司抑而不申
元軌察知遣使弔祭表上其事詔竝贈朝散大夫令加
旌表其禮賢愛善如此後因入朝屢上疏陳時政得失
多所匡益高宗甚尊重之及在外藩朝廷每有大事或

密制問焉高宗崩與侍中劉齊賢等知山陵葬事齊賢服其識練故事每謂人曰非吾輩所及也元軌嘗使國令徵封令白請依諸國賦物貿易取利元軌曰汝爲國令當正吾失反說吾以利耶拒而不納垂拱元年加位司徒尋出爲襄州刺史轉青州四年坐與越王貞連謀起兵事覺徙居黔州仍令載以檻車行至陳倉而死有子七人新書六人長子緒最有才藝上元中封江都王純安定王餘皆爵累除金州刺史垂拱中坐與裴承光交通被殺爲公神龍初與元軌竝追復爵位仍封緒孫暉爲嗣霍王景龍四年加銀青光祿大夫開元中左千牛員外將軍

號王鳳

字秀成

高祖第十五子也武德六年封幽王貞觀

七年授鄧州刺史賜實封六百戶十年徙封虢王歷虢

豫二州刺史二十三年加實封滿千戶

喜畋遊遇官屬九嬖使奴蒙虎

皮怖其參軍陸英俊幾死因大笑爲樂

麟德初累授青州刺史上元元年

薨年五十二贈司徒揚州大都督陪葬獻陵諡曰莊子

子平陽郡王翼嗣官至光州刺史永隆二年卒子寓嗣

無子則天時失爵鳳第三子定襄郡公宏則天初爲曹州

刺史

第五子東莞郡公融

新書名茂融

少以武勇見知垂拱中爲

申州刺史初黃公譔將與越王貞通謀深倚仗融以爲

外助時詔追諸親赴都融私使問其所親成均助教高
子貢曰可入朝以否子貢報曰來必取死融乃稱疾不
朝以俟諸藩期及得越王貞起兵書倉卒不能相應爲
僚吏所偪不獲已而奏之於是擢授銀青光祿大夫行
太子右贊善大夫未幾爲支黨所引被誅子徹神龍元
年襲封東莞郡公開元五年繼密王元曉改爲嗣密王
十二年改封濮陽郡王歷宗正卿金紫光祿大夫卒神
龍初封鳳嫡孫邕爲嗣號王邕娶韋庶人妹爲妻由是
中宗時特承寵異轉祕書監知隴右三使
仗內諸廐俄又改封汴
王開府置僚屬月餘而韋氏敗邕揮刃截其妻首以至

於朝深爲物議所鄙貶沁州刺史不知州事削封邑景雲二年復嗣號王還封二百戶累遷衛尉卿開元十五年卒子巨嗣別有傳

道王元慶高祖第十六子也武德六年封漢王八年改

封陳王貞觀九年拜趙州刺史賜實封八百戶十年改

封道王授豫州刺史

時諸王奉給薄於帝子至數婁之
大臣莫敢言十八年黃門侍郎褚

遂良爲太宗從
容言之不能行

二十三年加實封滿千戶永徽四年歷

滑州刺史以政績聞賜物二百段後歷徐沁衛三州刺

史元慶事母甚謹及母薨又請躬修墳墓優詔不許麟

德元年薨贈司徒益州都督陪葬獻陵謚曰孝子子臨

淮王誘嗣官至澧州刺史永淳中坐賊削爵次子詢壽
州刺史詢子微神龍初封爲嗣道王景龍四年加銀青
光祿大夫景雲元年宗正卿卒子鍊開元二十五年襲
封嗣道王廣德中官至宗正卿

鄧王元裕高祖第十七子也貞觀五年封鄧王十一年
改封鄧王賜實封八百戶歷鄧梁黃三州刺史元裕好
學善談名理與典籤盧照隣爲布衣之交二十三年加
實封通前一千五百新書作二百戶高宗時又歷壽襄二州刺

史兗州都督麟德二年薨贈司徒益州大都督陪葬獻
陵諡曰康無子以弟江王元祥子廣平公炅嗣神龍初

封炅子孝先爲嗣鄧王開元十三年右監門衛大將軍
冠軍大將軍卒

舒王元名高祖第十八子也年十歲時高祖在大安宮
太宗晨夕使尙宮起居送珍饌元名保傅等謂元名曰
尙宮品秩高者見宜拜之元名曰此我二哥家婢也何
用拜爲太宗聞而壯之曰此真我弟也貞觀五年封譙
王十一年徙封舒王賜實封八百戶拜壽州刺史後歷
滑許鄭三州刺史二十三年加實封滿千戶轉石州刺
史元名性高潔罕問家人產業朝夕矜莊門庭清肅常
誠其子豫章王直等曰藩王所乏者不慮無錢財官職

但勉行善事忠孝持身此吾志也及亶爲江州刺史以
善政聞高宗手敕褒美元名以賞其義方之訓高宗每
欲授元名大州刺史固辭曰忝預藩戚豈以州郡戶口
爲仕進之資辭情懇到故在石州二十年賞翫林泉有
塵外之意垂拱中除青州刺史又除鄭州刺史州境鄰
接都畿諸王及帝戚莅官者或有不檢攝家人爲百姓
所苦及元名到大革其弊轉滑州刺史政理如在鄭州
尋加授司空永昌年與子亶俱爲邱神勣所陷被殺爲
邱神勣所構詔繫獄死神龍初贈司徒復其官爵仍令
元名坐遷利州尋被殺以禮改葬時少子鄒國公昭已卒亶子津爲嗣舒王景龍四年加銀

青光祿大夫開元中授左威衛將軍卒子萬嗣天寶二年卒子藻嗣天寶九載封嗣舒王

魯王靈夔高祖第十九子也少有美譽善音律好學工草隸與同母兄韓王元嘉特相友愛貞觀五年封魏王十年改封燕王賜實封八百戶授幽州都督十四年改封魯王授兗州都督二十三年加實封滿千戶永徽六年轉隆州刺史後歷絳滑定等州刺史太子太師垂拱元年授邢州

新書
邢州

刺史四年與兄元嘉子黃公譔結謀

欲起兵應接越王貞父子事泄配流振州自縊而死有

二子長子銑封清河王

早

次子藹封范陽王

知越王必
敗自發其

謀得不誅

歷右散騎常侍爲酷吏所陷神龍初追復靈夔官

爵仍令以禮改葬封藹子道堅爲嗣魯王性嚴整雖在
閨門造次必於莊敬少年佐郡聲實已彰景龍四年加
銀青光祿大夫歷果隴吉冀洛汾滄等七州刺史國子
祭酒開元二十二年兼檢校魏州刺史未行政汴州刺
史河南道採訪使此州都會水陸輻奏實曰膏腴道堅
特以清毅聞入爲宗正卿卒

贈禮部尚書

子宇嗣二十九年

封嗣魯王至德元年從幸巴蜀爲右金吾將軍寶應元
年皇太子封爲魯王改字嗣鄒王道堅弟道邃中興初
封戴國公以恭默自守修山東婚姻故事頻任清列天

寶中爲右丞大理宗正二卿卒

江王元祥高祖第二十子也貞觀五年封許王十一年徙封江王授蘇州刺史賜寶封八百戶二十三年加寶封滿千戶高宗時又歷金鄜鄭三州刺史性貪鄙多聚金寶營求無厭爲人吏所患時滕王元嬰蔣王惲虢王鳳亦稱貪暴有授得其府官者以比嶺南惡處爲之語曰寧向儋崖振白不事江滕蔣虢元祥體質洪大腰大十圍飲啖亦兼數人其時韓王元嘉虢王鳳魏王泰狀貌亦偉不逮於元祥又眇一目永隆元年薨贈司徒并州大都督陪葬獻陵諡曰安子七子永嘉王暉永隆中爲

復州刺史以禽獸其行賜死於家

皎武陽王餘皆爵公武后時多及誅皎子

叢以幼流死嶺表葬南安人號其冢爲天孫墓

中興初元祥子鉅鹿郡公晃子

欽嗣江王景龍四年加銀青光祿大夫娶王仁皎女至

千牛將軍卒

又以皎封絕更取弟子繼宗嗣既而以郡王不襲降禮國公

密王元曉高祖第二十一子也貞觀五年受封九年授

號州刺史十四年賜實封八百戶二十三年加滿千戶

轉澤州刺史永徽四年除宣州刺史後歷徐州刺史上

元三年薨贈司徒揚州都督陪葬獻陵諡曰貞子南安

王穎嗣

子易嗣早薨

神龍初封穎弟亮

養

子曇爲嗣密王

元開

五年更詔元曉再從孫東莞郡公徹嗣徙封濮陽郡王

歷宗正卿金紫光祿大夫

滕王元嬰高祖第二十二子也貞觀十三年受封十五
年賜實封八百戶授金州刺史二十三年加實封滿千
戶永徽中元嬰頗驕縱逸遊動作失度高宗與書誡之
曰王地在宗枝寄深磐石幼聞詩禮夙承義訓實冀孜
孜無怠漸以成德豈謂不遵軌轍踰越典章且城池作
固以備不虞關鑰閉開須有常準鳩合散樂并集府僚
嚴關夜開非復一度過密之悲尙纏比屋王以此情事
何遽紛紜又巡省百姓本觀風問俗遂乃驅率老幼借
狗求置志從禽之娛忽黎元之重時方農要屢出畋遊
以彈彈人將爲笑樂取適之方亦應多緒何必此事方

得爲娛晉靈虐主未可取則趙孝文趨走小人張四又
倡優賤隸王親與博戲極爲輕脫一府官僚何所瞻望
凝寒方甚以雪埋人虐物旣深何以爲樂家人奴僕侮
弄官人至於此事彌不可長朕以王骨肉至親不能致
王於法今與王下上考以媿王心人之有過貴在能改
國有憲章私恩難再興言及此慙歎盈懷三年遷蘇州
刺史尋轉洪州都督官屬妻美者給爲妃召偏私之嘗爲典籤崔簡妻鄭嫚罵以履抵其面血流乃免元嬰慚歷旬不視事又數犯憲章削邑戶及親事帳內之

半於滁州安置後起授壽州刺史轉隆州刺史復不循法錄事參軍事裴聿諫正其失元嬰捫唇之聿入計具奏帝遷聿六品上階帝嘗賜諸王綵五百以元嬰及蔣王貪黷

但下書曰滕叔蔣弟不須賜給麻二車助爲錢緡二王大慙宏道元年加開府儀同

三司兼梁州都督文明元年薨贈司徒冀州都督陪葬

獻陵子十人子長樂王循琦嗣兄弟六人垂拱中竝陷詔

獄神龍初以循琦弟循琿循新書皆作修琿新書作信表作琿子涉嗣滕

王本名茂宗狀貌類胡而豐碩開元十二年加銀青光

祿大夫左驍衛將軍天寶初淮安郡別駕卒子湛然嗣

十一載封滕王十五載從幸蜀除左金吾將軍

史臣曰一人元良萬國以貞若明異重離道非出震雖

居嫡長寧固錡鎡況當開創之初未見太平之兆建成

殘忍豈主鬯之才元吉兇狂有覆巢之迹若非太宗逆

取順守積德累功何以致三百年之延洪二十帝之纂
嗣或堅持小節必虧大猷欲比秦二世隋煬帝亦不及
矣元嘉修身元軌無短元裕名理元名高潔靈夔嚴整
皆有封冊之名而無磐石之固武氏之亂或連頸被刑
姦臣擅權則束手爲制其望本枝百世也不亦難乎
贊曰有功曰祖有德曰宗建成元吉實爲二兇中外交
構人神不容用晦而明殷憂啟聖運屬文皇功成守正
善惡旣分社稷乃定盤維封建本枝茂盛元嘉元軌修
身慎行元裕元名行簡居正犬牙不固武氏易姓旣無
兵民若拘陷甯敢告後人無或失政

唐書卷第一百十五